



ილიას სახელმწიფო უნივერსიტეტი



საქართველოს ჰაილანდის
ჯორჯიანი ბიბლიოთეკა

დავით აღმაშენებელი

გალობანი
სინანულისანი

დავით აღმაშენებელი
გალობანი სინანულისანი

გალობანი სინანულისანი

რომლისაცა წინაშე ქედდადრეკილ არს ყოველი მუჭლი, ყოველი მოდრკების და ენად ყოველი შენსა ჳმობს აღსარებასა; მეცა სიტყუაო, აღმსარებელსა მომხედენ! ხატსა თვისსა მამსგავსე და საკრველად გრძნობადისა და გონიერისა მყოფობისად დამაწესე, შენებრ არსთა სიტყუებისა ჩემ შორისცა შეკრებითა, ხოლო მე უმაღლო გექმენ. ბუნებითნი რად ძალნი არა სჯულთაებრ ვიკუმეინ, მსგავსებისაგან დავაკლდი და დავჳბადე ბოროტი, ხოლო ხილულთა-მიერსა გემოვნებასა ვრცელად განუხუენ გრძნობანი.

ქალწულო, ბრალეულთა თავსმდებო, რომელმან სიტყუად განაზრქვე დაკრვითა ჳორცთა მიწისადთა, სიზრქე უსასოებისად განმძარცუე, რათა მონანული შეგივრდე შენ. ბუნებითსა რად ჳორფირსა თვთმფლობელობასა თანა მეფობისააცა შარავანდედნი მარწმუნენ, ხოლო მე ვნებათა ბილწთა მონებად მივჳყიდე თავი, რამეთუ რომლისაგანცა ვინ ძლეულ არნ, მისდაცა დამონებულ არიან. კაენის მჳულელებრი ცნობად, სეითის ძეთა ლირწებად, გმირთა სილოდით მავალობად, ხუთქალაქელთა შეგინებისა მწჳრე უფროდსად ვამრავალწილე, ვითარცა რად დაღმართ-მსრბოლმან მდინარემან უკეთურებისამან. მეგჳპტური გულმძიმობად, ქანანელთა ჩუჩლუბანი, მსხუერპლვად ნაშობთად, ჳმნად და სახრვად, კოწოლი თმათად და სხუანი, რომელთად შენ ჳბრძანე არამსგავსებად, უწარმდებესად მოვიგენ თვთ მათ ჳირმშოთა სახეთასაცად. ამისთჳს იყო ქალწული და ჳორცქმნად სიტყჳსად, რათა დედობრივთა ოხათა მიერ ცხონდენ ცოდვილნი, რომელთად ჳირველი, საშუალი და დასასრული მე ვარ, ვითარცა უფსკრული შესაკრებელი ბილწებისა ლუართად.

ისრაელისა მეფეთა ვჳბადევედ, გარნა უშჳულოთა, და რავდენ მეძლო, ვსცთებოდე მაღალთა ჳედა კუმევისა და წარმართთა აღრევისა მიერ და ძალთა ცისათა თაყუანის-ცემისა.

ჳენაძსა მოძრაობისა ასურასტანული ჳმნობად და ცთომილთა

ვარსკულავთა და უცთომელთა კრებად, განყრად, სუე და ბედი და შობის დღე, ვითარ საღმრთოთა უსმენელმან, ვიჩქურენ.

ელლინთა-მიერი ვერცნობად სიბრძნეთა ღმრთისათად, ღმრთისა და შემოქმედისაგან შექმნულთა მიმართ ცვალებად თაყუანის-ცემისად სრულ ვყავ, რაჟამს თითოეულისა ვნებისა კერპსა ვჰმსახურე. ამისთვის ღმერთ-მამაკაცებრ მოქმედ იქმნა ზესთა ღმერთი, რათა კაცებრ უწყოდნის ვნებანი ჩუენნი და ღმრთებრ იჯსნიდეს ბრალთაგან, რომელთა ღმრთისმშობელად ქადაგონ წმიდად ქალწული დედად.

სჯულნი დავთრგუნენ წიგნისა[ნი] და ახალი ბუნებითი, და კუალად სხუად, სჯულისა შენისა მოწამე, სჯული გონებისად, ცოდვათა და ჯორცთა შჯულსა დავამონე. თითოეულსა მჯეცთაგან შეზავებულსა მჯეცსა ვემსგავსე მრავალგუარსა და მრავალხატსა და სხუა ჟამ სხუებრ ხილულსა და მკსინვარსა ბუნებისაებრ თითოეულისა.

არა შევძრწუნდი მანგლისაგან მფრინვალისა, რომელი შურსა სიკუდილისასა მიჰკდის, რომელნი ჩემებრ მიმდემად ცრუდ ფუცვიდენ განსაკრთომელსა სახელსა შენსა. ამისთვის სისხლთა ქალწულებრივთაგან ჯორცნი ღმრთისანი და ახალი შეზავებად 1იქმნა1, ღმერთი და კაცი, რათა იოხდეს დედად ჩემებრ განწირვით უსასოქმნილთა. სოლომონისადასა წურბლისა მსგავსად ვერმადლარი სხუათა სოფლის-კიდეთა ვეძიებდ დასაპყრობელად და ღმრთისა საზღვართა ვაბრალობდ, ვითარცა მცირეთა და უნდოთა, ჩემისამდე უძღებებისა და გულის-თქუმისა. ბოროტად გარდავკედ საზღუართა და შევჰრთე სახლი სახლსა და აგარაკი აგარაკსა და უუძღურესთა მივჰხუეჰე ნაწილი მათი და ვილუწიდ უმეზობლობასა, ვითარმცა მარტომ ვმკვდრობდ ქუეყანასა ზედა.

მზრძოლ ვექმენ ყოველთა წესთა სჯულისათა და ქორწილთა მიერ ხენეშთა ვჰმძლავრე საწოლსა ჩემსა, და სახეთა მიერ ბოროტთა მიცემითა ვაცოდვე ერი ჩემი, ვითარცა იგი მეფეთა მისთა ისრაელი. ამისთვის ქალწული დედად და შობად ახალი სიტყვსად [იქმნა], რათა ახალი

ხატყოფად მეორედ მისცეს ცოდვით განმრყუნელთა მისთა, დედობრივთა რად ოხათა ბრძმედითა დაადნოს ყოველი ნივთი შეცოდებისად. ვეცხლი, ვითარცა მიწად, და ოქროდ, ვითარ თიჯად უბნისად, ვიუნჯენ და თაყუანის-ვეც ანგაპრებისა მამონას, ვითარ-იგი ძუელთა მათ ბაალს და ასტარტეს და ქამოსს სამაგელსა. სიტყუად ღმრთისად და ბჭეთა ზედა მამხილებელი მოვიძულენ, ხოლო მლიქნელთა ძმაცული სივერაგე ვითნე და შემასმენელთანი დავიტკბენ ზრახვანი და ცრუნი განვსცენ მსჯავრნი. ცრემლნი ქურივთანი და ობოლთა ბრგუნვილი ტირილი არა შევიწყალე, არა განუხუენ ნაწლევნი მოქენეთა, უფროდსლა შენ, ქრისტე, რომელი იზრდები მცირედითა ზრდითა მათითა. ამისთვს შობად ღმრთისად ადამიანისაგან დედაკაცისა 1იქმნა1, რათა მიწით-შობილთა კაცთა ცთომასა, ვითარცა ღმრთისა დედად, დაჰკსნიდეს ქალწული და იოხდეს ცოდვილთა.

ესენი ვცოდენ: სახარებისა სჯულთა და მცნებათა შენთა შინა მცემელთა რად ყურიმლისა მიპყრობასა და გლახაკათვს განშიშულებასა და რადთურთით არა ფიცსა შენ, სჯულის-მდებელი ჩემი, ჰბრძანებდი და გულის-თქუმით მიმხედველობასა განსრულებულად მრუშებად დასდებდი. დაღაცათუ ესრეთ განვზრწნენ ყოველნი გრძნობანი და ყოვლადხრწნილება ვიქმენ, გარნა არავე აღვიხუენ ჳელნი, არცა დავდევ სასოებად ჩემი ღმრთისა მიმართ უცხოდსა, არცა უცხოთესლი რადმე სარწმუნოებად საწურთელ-ვყავ სულისა, გარეშე მისსა, რომელი მასწავეს ღმრთისმეტყუელთა შენთა. და აწ, მომდრეკელი მუჯლთა გულისათად, ვკმობ, ვითარცა სხუად მანასე: მილხინე, მ მეუფეო, მილხინე, და ნუ წარმწყმედ ცოდვათა შინა და ნუ მოიკსენებ ძვრთა ჩემთა და ნუ დამსჯი მე ქუესკნელთა თანა, რამეთუ შენ ხარ ღმერთი მონანულთად, ამაღლებული ზესკნელს ცათა ძალთაგან. საკუთრად ღმრთისმშობელად გქადაგებთ, უხრწნელო ქალწულო, და გურწამს, ვითარმედ პატივი ხატისა შენისად შენდამო წიად-მოვალს <და> ღმრთის-მეტყუელთაებრ და ცოდვილთა მოქცევასა ანიშებ მის მიერ, ვითარცა ცხად ჳყოფს თეატროდ იგი მრჩობლთა სოფელთად - სიკეთე ეგვპტისად, ღირსი

მარიამ.ჟამი რად წუხილთა და ავთა აღმოფშვნათადა წარმოდგეს, ზარი მეფობისადა წარცდეს და დიდებადა დაშრტეს, შუებანი უქმ იქმნენ, ყუავილოვნებადა დაქნეს, სხუამან მიიღოს სკიპტრად, სხუასა შეუდგენ სპანი, - მაშინ შემიწყალე, მსაჯულო ჩემო!

გან-რად-ელოს წიგნი დღესა შინა სასჯელისასა და მე ქედდადრეკილი წარმოგიდგე განკითხვად, მსაჯული მართლ სჯიდეს, მსახურთა რისხუად ქროდის, მართალნი ნეტარებდენ, ცოდვილთა ჰგუემდეს ცეცხლი, - მაშინ შემიწყალე, იესუ ჩემო!

ვინადთგან აღსარებით გრძნობად და შეკრებადა იწყო ძუალი ძუალსა თანა და ნაწევარი ნაწევარსა და განკმელთა მოჰბერა სული კუალად-გებისადა, მრწამს, ვითარმედ აღვსებადა სრულ-ყოს ღმერთმან ჩემ შორის ყოველივე სინანულით აღდგომისადა.

მარტიო სრულო სამ-მზეო, ერთ-ცისკროვნებაო, განმინათლე მხედველობადა სულისადა, რათა გიხილო ნათელი ნათლითა უფლისადათა, სულითა ღმრთისადათა მე გამოგ|ვიბრწყინვო მაშინ დაუსრულებელთა საუკუნეთა.არად უხილავს მზესა ქალწული დედადა, თვნიერ შენსა, არცა ჩემოდნად ბრალეულსა ნათელი მისი, გარნა მე შენითა ოხითა, დედოფალო, ვესავ ხილვად ნათელსა მისა შენისასა და ნათელსა ზეშთა საუკუნეთასა.